

共同經課 - 1 列王記上十七章八節~二十四節

8 耶和華 ê 話臨到伊講，9 你起來去到 Se-tùn ê Sat-lèk-hoat，khia 起 tī-hia；看 ah，我已經命令 hit 所在一個守寡人養飼你。10 伊就起來，去 Sat-lèk-hoat；到城門 ê 時，tú-tng 有一個守寡人 tī hit 所在 teh 拾柴。以利亞就叫伊講，求你用器具 iúⁿ 淡薄水來 hō 我 lim。11 伊去 iúⁿ ê 時，以利亞 koh 叫伊講，請你順手 thèh 淡薄餅來 hō 我。12 婦人人講，我 kī 永活 ê 耶和華你 ê 上帝來講，我無一個餅，只有一把 á 麵粉 tī 桶裡，kap 淡薄油 tī 瓶裡；看 ah，我拾兩支柴，beh tò 去為 tiòh 我 kap 我 ê kiáⁿ pek 逼伊，阮 thang 食伊，chiah 死。13 以利亞 kā 伊講，免驚；去 ah，照你所講 ê 來行；總是事先 kā 我做一個細 ê 餅，帶來 hō 我，然後為 tiòh 你 kap 你 ê kiáⁿ 做伊。14 因為耶和華以色列 ê 上帝 án-ni 講，桶內 ê 麵粉 boē 減少，瓶內 ê 油 boē 了，到耶和華落雨 tī 地上 ê 日。15 婦人人就去，照以利亞 ê 話來行；婦人人 kap 伊 ê 家 kap 以利亞食 choē-choē 日。16 桶內 ê 麵粉無減，瓶內 ê 油無了，tú 照耶和華託以利亞所講 ê 話。17 Chiah-ê tǎi-chì 了後，chit-ê 婦人人，就是 hit 家 ê 主人，伊 ê kiáⁿ 破病，病真傷重，致到伊無一條氣絲。18 婦人人 kā 以利亞講，上帝 ê 奴僕 ah，我 kap 你甚麼干涉？你來我 chia hō 上帝記得我 ê 罪，hō 我 ê kiáⁿ 死 ah。19 以利亞 kā 伊講，將你 ê kiáⁿ 交我。以利亞就 tùi 婦人人 ê 胸前抱去，帶到所 tiàm ê 樓，hē tī 家己 ê 床；20 就求叫耶和華講，耶和華我 ê 上帝 ah，你 kiám koh 降災厄 tī 我所 kap 伊 toà ê 守寡人，害死伊 ê kiáⁿ ah？21 以利亞就仆 tī gín-ná ê 身軀三 pái，求耶和華講，耶和華我 ê 上帝 ah，求你 hō chit-ê gín-ná 回魂。22 耶和華聽以利亞 ê 聲，gín-ná ê 魂就復到，伊就活。23 以利亞就抱 hit-ê gín-ná tùi 樓頂落來，入厝交 hō 伊 ê 老母。以利亞講，看 ah，你 ê kiáⁿ 活 lah。24 婦人人對以利亞講，Taⁿ 我知你是上帝 ê 奴僕，你所講耶和華 ê 話是真實。

共同經課 - 2 詩篇一百四十六篇

1 Lín tiòh o-ló 耶和華。我 ê 心 ah，你 tiòh o-ló 耶和華。2 我一生 beh o-ló 耶和華；我 iáu 活 ê 時，beh 唱歌 o-ló 我 ê 上帝。3 Lín 莫得 oá 靠君王，莫得 oá 靠世間人；In 一點 á boē 能幫贊。4 伊一下斷氣，就歸土；伊所計畫-ê，tī hit 日就消滅。5 有雅各 ê 上帝做伊 ê 幫贊，Ng 望伊 ê 上帝耶和華 ê，chit 號人有福氣；6 伊是創造天，地，海，kap 其中 ê 萬物；伊保守誠實到 tī 永遠；7 伊為 tiòh 受冤屈 ê 人伸冤；賞賜食物 hō iau 餓-ê。耶和華 tháu 放受關監-ê；8 耶和華開 chhiⁿ-mí 人 ê 目矙；耶和華扶起受壓制 ê 人；耶和華疼惜義人；9 耶和華保護出外人；扶持孤兒寡婦；獨獨 pháiⁿ 人 ê 道路，hō 伊彎曲。10 耶和華 beh 做王到永遠；錫安 ah，你 ê 上帝 beh 做王到萬代。Lín tiòh o-ló 耶和華。

共同經課 - 3 加拉太書一章十一節~二十四節

11 兄弟 ah，我報 lín 知論我平素所傳 ê 福音，hit-ê m̄ 是照人 ê 意思。12 因為我未 bat tùi 人受 tiòh，也無受人教示，是 tùi 耶穌基督 ê 啓示。13 Lín bat 聽見我前 tī 猶太到所行做 ê，就是 khún-tiòk 上帝 ê 教會真 thiám，來陷害伊。14 Koh 我 tī 猶太到比本族同輩 ê choē-choē 人 khah 進步，為 tiòh 我祖宗 ê 遺傳 koh-khah 熱心。15 但是 tùi 阮老母 ê 胎分別我，用伊 ê 恩典召我 ê 上帝，16 既然歡喜將伊 ê Kiáⁿ 顯明 tī 我，beh hō 我宣傳伊 tī 外邦，我就無 kap 人參詳，17 也無上耶路撒冷就近 hiah-ê 事先我做使徒 ê；獨獨去阿拉伯，koh tò-tng 來大馬色。18 三年後，我上耶路撒冷，去探磯法，kap 伊 toà 十五日。19 其餘 ê 使徒，除去主 ê 兄弟雅各以外，我 lóng 無見 tiòh。20 Taⁿ 我所寫 hō lín ê，我 tī 上帝 ê 面前無白賊。21 後來我到敘利亞 kap Ki-lī-ka ê 地方。22 Hit 時屬猶太地 tiàm-tī 基督 chiah-ê 教會，iáu-kú m̄-bat 我 ê 面；in kan-ta 聽見講，23 前 khún-tiòk 咱 ê，taⁿ 傳伊平素所陷害 ê 教；24 就因為我歸榮光上帝。

共同經課 - 4 路加福音七章十一節~十七節

11 Koh 無 joā 久，耶穌去一個城名叫 Ná-in；伊 ê 學生 kap Kui 陣人 kap 伊同行。12 Beh 近城門，tú-tng 有人扛一個死人出來，伊 ê 老母孤孤生 chit-ê Kiáⁿ，koh 是守寡。城內有 choē-choē 人 teh 送伊 13 主看見就憐憫伊，kā 伊講，莫得哮。14 就 oá 去，摸 hit-ê Khoà 身屍 ê 架，扛 ê 人停腳；伊就講，少年人 ah，我 kā 你講，起來。15 死 ê 人就起來坐，續講話。16 耶穌就將伊 hō 伊 ê 老母。眾人 lóng 驚惶，歸榮光上帝講，大先知有興起 tī 咱中間；koh 講，上帝有看顧伊 ê 百姓。17 Tùi án-ni 耶穌 chit-ê 名聲遍傳 tī 猶太 kap 周圍 ê 地方。